

“МОНГОЛЫН ЦАХИЛГААН ХОЛБОО” ХК-ИЙН ИХ ХЭМЖЭЭНИЙ БОЛОН СОНИРХЛЫН ЗӨРЧИЛТЭЙ ХЭЛЦЭЛ ХИЙХ ЖУРАМ

НЭГ. НИЙТЛЭГ ҮНДЭСЛЭЛ

1.1. Энэхүү Их хэмжээний болон сонирхлын зөрчилтэй хэлцэл хийх журам (цаашид “Журам гэх)-аар Компанийн их хэмжээний хэлцэл, нэгдмэл сонирхолтой этгээд, түүнтэй хийх хэлцлийг тодорхойлох, Компанийн үйл ажиллагаанд сонирхлын зөрчил, түүнээс урьдчилан сэргийлэхтэй холбогдсон харилцааг зохицуулна.

1.2. Компани нь их хэмжээний болон сонирхлын зөрчилтэй хэлцэл хийхдээ Компанийн тухай хуулийн 11 дүгээр бүлэг, 12 дугаар бүлэг болон холбогдох бусад хууль тогтоомжийг мөрдөнө.

1.3. Сонирхлын зөрчилтэй хэлцэл хийх этгээд нь Компанийн тухай хуулийн 91 дүгээр зүйлд заасан шаардлагыг бүрэн хангасан этгээд байна.

1.4. Сонирхлын зөрчилтэй хэлцэл хийхдээ Компанийн тухай хуулийн 92 дугаар зүйлд заасан журмыг баримтална. Компани нь өөрийн нэгдмэл сонирхолтой болон хамаарал бүхий этгээдэд Компанийн өдөр тутмын үйл ажиллагаатай холбоотой буюу үндсэн бүтээгдэхүүн үйлчилгээг нийтэд зарласан нөхцөл, тариф, болон холбогдох журам, зааврын дагуу үзүүлэх бөгөөд тухайн бүтээгдэхүүн үйлчилгээтэй холбоотой гэрээ, хэлцэл байгуулах зөвшөөрлийг Компанийн ТУЗ-өөс Компанийн Гүйцэтгэх захиралд тодорхой нөхцөлийн хүрээнд урьдчилан олгож болно.

1.5. Гүйцэтгэх удирдлага нь энэхүү журмын 1.4-т заасны дагуу байгуулсан гэрээ, хэлцлийн тайланг улирал бүр нэгтэн, дараа сарын 10-ны өдрийн дотор ТУЗ-ийн хуралд танилцуулна.


ХОЁР. НЭГДМЭЛ СОНИРХОЛТОЙ ЭТГЭЭДИЙГ ТОДОРХОЙЛОХ, БҮРТГЭХ

2.1. Энэхүү журмаар зохицуулах “Ашиг сонирхлын зөрчил” гэдэгт Компанийн эрх бүхий албан тушаалтан хууль болон гэрээгээр олгогдсон эрхээ хэрэгжүүлэх явцад түүний хувийн ашиг сонирхол Компанийн ашиг сонирхолтой зөрчилдөх болон албан үүргээ хэрэгжүүлэхэд харшаар нөлөөлж болохуйц нөхцөл байдлыг ойлгоно.

2.2. Компанийн дүрэмд заасны дагуу “Компанийн эрх бүхий албан тушаалтан” буюу мэдүүлэг гаргагч гэдэгт дараах этгээдийг ойлгоно. Үүнд:

- 2.2.1. ТУЗ-ийн дарга, ТУЗ-ийн гишүүн, нарийн бичгийн дарга;
- 2.2.2. Гүйцэтгэх захирал, газрын захирал
- 2.2.3. Ерөнхий нягтлан бодогч

2.3. Компанийн тухай хууль, Нийтийн албанд нийтийн болон хувийн ашиг сонирхлыг зохицуулах ашиг сонирхлын зөрчлөөс урьдчилан сэргийлэх тухай хуульд заасны дагуу дараах хамаарал бүхий этгээдийг энэхүү журамд заасан нэгдмэл сонирхолтой этгээд гэж үзнэ. Үүнд:



2.3.1. Тодорхой гэрээний үндсэн дээр хамтран Компанийн удирдлагын шийдвэрийг тодорхойлох боломж бүхий бүлэг хүмүүс;

2.3.2. Компанийн тухай хуулийн 6 дугаар зүйлийн 6.14 дэх хэсэгт заасны дагуу тодорхойлсон компанийн нэгдэлд хамаарч байгаа компанийн хувьд компанийн нэгдлийн бусад оролцогч компани, тэдгээрийн эрх бүхий албан тушаалтан;

2.3.3. Компанийн удирдлагын шийдвэрийг хамтран тодорхойлох боломж бүхий компани болон хүн /бүлэг хүмүүс/;

2.3.4. Нэг хүн /бүлэг хүн/ гаргах шийдвэрийг нь тодорхойлох боломж бүхий компани;

2.3.5. Энэхүү журмын 2.2-т заасан албан тушаалтан;

2.3.6. Энэхүү журмын 2.2-т заасан эрх бүхий албан тушаалтны гэр бүлийн гишүүн, эцэг, эх, хүүхэд, ач, зээ, ах, дүү, бусад төрөл, садангийн хүн, тэдгээр нь өөрсдийн ажиллаж байгаа болон хувьцааг нь эзэмшдэг компанитай хийгдэж байгаа хэлцлийн үр дүнгээс шууд болон шууд бусаар үүсэх орлогоос хувь хүртэж байгаа тохиолдолд уг гэрээнд оролцогч талууд;

2.3.7. Өөрөө, эсхүл нэгдмэл сонирхолтой этгээд нь хувьцааны хяналтын багцыг нь эзэмшдэг болон эрх бүхий албан тушаалд ажилладаг компани, уг компани оролцогч нь болж байгаа компанийн нэгдлийн бусад оролцогч компани болон тэдгээрийн хувьцааны хяналтын багцыг эзэмшигч болон эрх бүхий албан тушаалтан;

2.3.8. Уг этгээд ажил олгогч бол түүний ажилтан;

2.3.9. Гүйцэтгэх захирлын шийдвэрээр худалдан авалт, тендерийн асуудал хариуцсан нэг удаагийн шинжтэй их хэмжээний хэлцэл хийх албан тушаалтан.

2.4. Энэхүү журмын 2.2-т хамаарах Компанийн эрх бүхий албан тушаалтан нь энэхүү журмын 2.3-т заасан нэгдмэл сонирхолтой этгээдийн талаарх мэдээллийг ТУЗ-ийн нарийн бичгийн дарга, Дотоод аудитын асуудал хариуцсан нэгжид дор дурдсан хугацаанд үнэн зөвөөр мэдүүлэх үүрэгтэй байна. Үүнд:

2.4.1. Журмын 2.2-т хамаарах одоогийн албан тушаалтнууд энэ журам батлагдсанаас хойш 1 сарын дотор;

2.4.2. Журмын 2.2-т заасан эрх бүхий албан тушаалд нэр дэвших үедээ;

2.4.3. Нэгдмэл сонирхолтой этгээдийн жагсаалтад өөрчлөлт орсноос хойш ажлын 10 өдрийн дотор.

2.5. Компанийн холбогдох эрх бүхий албан тушаалтан нь Нийтийн албанд нийтийн болон хувийн ашиг сонирхлыг зохицуулах, ашиг сонирхлын зөрчлөөс урьдчилан сэргийлэх хуулийн дагуу төрийн эрх бүхий байгууллагад нэгдмэл сонирхолтой этгээдийн талаарх мэдүүлгээ мэдүүлсэн нь энэ журмын 2.4-т заасан үүргээс чөлөөлөгдөх үндэслэл болохгүй.

2.6. ТУЗ-ийн нарийн бичгийн дарга нь компани болон компанийн эрх бүхий албан тушаалтны нэгдмэл сонирхолтой этгээдийн талаарх мэдээллийн сан бүрдүүлж, их хэмжээний эсхүл сонирхлын зөрчилтэй хэлцэл эсэхийг тодорхойлох зорилгоор хэлцэл хийгдэхийн өмнө лавлагаа гаргаж өгч байх ба ТУЗ, Гүйцэтгэх захиралд тухай бүрт нь танилцуулж, хийгдсэн их хэмжээний болон сонирхлын

зөрчилтэй хэлцлийн талаарх мэдээллийг эрх бүхий зохицуулах байгууллагаас баталсан журмын хүрээнд тогтоосон хугацаанд хөрөнгө оруулагч болон олон нийтэд мэдээлэх үүрэгтэй байна.



ГУРАВ. СОНИРХЛЫН ЗӨРЧИЛТЭЙ ХЭЛЦЭЛ

3.1. Компанийн энгийн хувьцааны 20 буюу түүнээс дээш хувийг дангаараа эсхүл түүнтэй нэгдмэл сонирхолтой этгээдтэй хамтран эзэмшиж байгаа хувьцаа эзэмшигч, компанийн эрх бүхий албан тушаалтан, түүнтэй нэгдмэл сонирхолтой этгээд нь өөрийн ажиллаж байгаа болон хувьцааг нь эзэмшиж байгаа компанитай дор дурдсан харилцаанд орсон бол компанитай, эсхүл түүний толгой, охин, сонирхлын зөрчилтэй хэлцэл хийх этгээдэд тооцогдоно. Үүнд:

3.1.1. Хэлцлийн нөгөө тал, эсхүл хэлцэлд төлөөлөгч буюу зуучлагчаар оролцож байгаа;

3.1.2. Хэлцлийн нөгөө тал болон оролцож байгаа, эсхүл уг хэлцэлд төлөөлөгч буюу зуучлагчаар оролцож байгаа хуулийн этгээдийн эрх бүхий албан тушаалтан, эсхүл энгийн хувьцааны /ногдол хувийн/ 20-оос дээш хувийг дангаараа буюу түүнтэй нэгдмэл сонирхолтой этгээдтэй хамтран эзэмшиж байгаа;

3.1.3. Хэлцлийн нөгөө тал болон оролцож байгаа, эсхүл төлөөлөгч буюу зуучлагчаар оролцож байгаа хуулийн этгээдийн толгой компанийн эрх бүхий албан тушаалтан, эсхүл уг компанийн энгийн хувьцааны /ногдол хувийн/ 20 буюу түүнээс дээш хувийг дангаараа болон нэгдмэл сонирхолтой этгээдтэй хамтран эзэмшиж байгаа;

3.1.4. Хэлцлийн үр дүнд шууд буюу шууд бусаар үүсэх орлогоос хувь хүртэж байгаа.

3.2. Компани нь Компанийн тухай хуулийн 89 дүгээр зүйлийн 89.3 дахь хэсэгт заасны дагуу дараах хэлцлийг сонирхлын зөрчилтэй хэлцэл гэж үзэхгүй. Үүнд:

3.2.1. Хувьцаа эзэмшигч нь Компанийн тухай хуулийн 38 дугаар зүйлд заасны дагуу хувьцааг тэргүүн ээлжид худалдан авах эрхээ хэрэгжүүлэх;


3.2.2. Компани нь хувьцаа эзэмшигч тус бүрээс тэдний худалдахаар санал болгож байгаа хувьцааг санал болгосон нийт хувьцааны төрөл тус бүрийн тоотой хувь тэнцүүлэн худалдах авах;

3.2.3. Компани нь энгийн хувьцааны 75 буюу түүнээс дээш хувийг нь эзэмшиж буй компанитай Компанийн тухай хуулийн 20 дугаар зүйлд заасны дагуу нэгтгэх хэлбэрээр өөрчлөн байгуулагдах.

3.3. Сонирхлын зөрчилтэй хэлцэл хийх шийдвэрийг ТУЗ-ийн гишүүдийн олонхын саналаар шийдвэрлэх бөгөөд ингэхдээ сонирхлын зөрчилтэй ТУЗ-ийн гишүүд шийдвэр гаргахад санал өгөх эрхгүй байна.

3.4. Гүйцэтгэх захиралд сонирхлын зөрчилтэй хэлцэл хийх зөвшөөрөл олгох тухай асуудлыг ТУЗ-ийн хурлаар хэлэлцүүлж, ТУЗ-ийн хараат бус гишүүд заавал оролцоно.

3.5. Сонирхлын зөрчилтэй хэлцэл хийхийг зөвшөөрөх тухай шийдвэрийг уг хэлцлийг хийх талаар сонирхлын зөрчилгүй төлөөлөн удирдах зөвлөлийн гишүүдийн олонхын саналаар батална.



3.6. Нэгдмэл сонирхолтой этгээдтэй сонирхлын зөрчилтэй хэлцэл хийх эрх, хэлцлээр тохирох гэрээний нөхцөл, захиран зарцуулах хөрөнгө, эд хөрөнгийн болон мөнгөөр үнэлж болох бусад эрхийн зах зээлийн үнэ, үйлчилгээний хөлсний хэмжээг ТУЗ-ийн тогтоолд заавал дурдсан байна.

3.7. Дараах тохиолдолд сонирхлын зөрчилтэй хэлцэл /хоорондоо уялдаатай хэд хэдэн хэлцэл/ хийх, толгой, охин, хараат компанид сонирхлын зөрчилтэй хэлцэл хийхийг зөвшөөрөх буюу шаардах шийдвэрийг хувьцаа эзэмшигчдийн хурлаар хэлэлцүүлж хуралд оролцож байгаа сонирхлын зөрчилгүй хувьцаа эзэмшигчдийн олонхын саналаар шийдвэрлүүлнэ. Үүнд:

3.7.1. Компанийн тухай хуулийн 55 дугаар зүйлд заасны дагуу компанийн ТУЗ-өөс тогтоосон хэлцлийн үнэ буюу эд хөрөнгө, эд хөрөнгийн болон мөнгөөр үнэлж болох бусад эрх, үйлчилгээний үнэ хөлс нь хэлцэл хийх тухай шийдвэр гарах үеийн бүртгэлийн үнийн дүнгийн 25 хувиас их байх;

3.7.2. Компанийн гаргах энгийн эрхийн хувьцаа, энгийн хувьцаа худалдан авах эрхийн бичиг буюу энгийн хувьцаанд хөрвөх үнэт цаасны хэмжээ нь компанийн буюу түүний хараат хувьцаат компанид урьд нь гаргасан энгийн хувьцааны үнийн дүнгийн 25 хувиас их байх;

3.7.3. Төлөөлөн удирдах зөвлөлийн бүх гишүүн нь хэлцэл хийх сонирхол бүхий этгээд байх.

ДӨРӨВ. СОНИРХЛЫН ЗӨРЧЛИЙГ ЗОХИЦУУЛАХ

4.1. Компанийн ТУЗ нь нэгдмэл сонирхолтой этгээдтэй сонирхлын зөрчилтэй хэлцэл хийхэд дараах эрх, үүрэгтэй оролцоно. Үүнд:

4.1.1. Компанийн бизнесийн үйл ажиллагаанд харшлахгүй, нэгдмэл сонирхолтой этгээдийн мэдээллийг үнэн зөвөөр мэдүүлсэн гэж үзвэл энэхүү журамд заасан хэлцэл хийх зөвшөөрөл олгох;

4.1.2. Энэ журмын 3.7-д заасан тохиолдолд сонирхлын зөрчилтэй хэлцэл хийх асуудлыг хувьцаа эзэмшигчдийн хурлаар хэлэлцүүлэн шийдвэрлүүлэх;


4.1.3. Компанийн ТУЗ-ийн аль нэг гишүүнд хамааралтай “Сонирхлын зөрчилтэй” хэлцэл хийх эсэх шийдвэрийг хуралд оролцож байгаа сонирхлын зөрчилгүй ТУЗ-ийн гишүүдийн олонхын саналаар шийдвэрлэх;

4.1.4. Сонирхлын зөрчилтэй хэлцлийн хэмжээ, үнэ, нөхцөлийг тодорхойлж, тогтоол шийдвэрт тухайлан тусгах;

4.1.5. Компанийн эрх бүхий албан тушаалтнуудын нэгдмэл сонирхолтой этгээдийн мэдүүлэг, жагсаалтыг тухай бүрт нь авч бүртгэл хөтөлж, өөрчлөлтийг тусгаж байгаа эсэхэд хяналт тавих.

4.2. Компанийн ТУЗ-ийн нарийн бичгийн дарга, Дотоод аудитын асуудал хариуцсан нэгж нь компанид үүсэж болох ашиг сонирхлын зөрчлөөс урьдчилан сэргийлэх хүрээнд дараах эрхийг эдэлж, үүрэг хүлээнэ. Үүнд:

4.2.1. Энэхүү журмын 2.3 дахь хэсэгт заасан эрх бүхий албан тушаалтны нэгдмэл сонирхолтой этгээдийн талаарх мэдээллийг хүлээн авах;



4.2.2. Эрх бүхий албан тушаалтан нь хууль болон энэ журмаар хүлээсэн үүргээ биелүүлэхгүй байх тохиолдолд мэдээллийг хугацаандаа өгөхийг шаардах, үүрэг болгох;

4.2.3. Компани болон компанийн эрх бүхий албан тушаалтнуудын нэгдмэл сонирхолтой этгээдийн бүртгэл хөтөлж, хэлцэл хийх үед тухайн хэлцэл сонирхлын зөрчилтэй эсэх талаар лавлагаа гаргаж өгөх, компани, түүний эрх бүхий албан тушаалтны мэдээлэлд орсон өөрчлөлтийг тухай бүр шинэчилж, ТУЗ-д танилцуулах;

4.2.4. Сонирхлын зөрчилтэй хэлцэл хийх зөвшөөрөл олгох эсэх асуудал хэлэлцсэн ТУЗ-ийн хурлын тэмдэглэлд сонирхол бүхий болохоо ТУЗ-ийн гишүүн мэдэгдсэн тухай, сонирхол бүхий гишүүн санал хураалтад оролцоогүй тухай болон уг асуудлыг дэмжсэн, татгалзсан саналын хувь, гарсан шийдвэр зэргийг тодорхой тусгах буюу тусгасан эсэхийг хянах, баталгаажуулах

4.3. Компанийн Гүйцэтгэх захирал нь сонирхлын зөрчилтэй хэлцлийг байгуулах талаар дараах эрх, үүргийг хэрэгжүүлнэ. Үүнд:

4.3.1. Аливаа гэрээ, хэлцлийг хянахдаа Компанийн тухай хууль, энэхүү журамд тодорхойлсон сонирхлын зөрчил үүсэх нөхцөл байгаа эсэхийг хянах ба сонирхлын зөрчилтэй хэлцэл байж болзошгүй тохиолдолд хэлцэл хийх сонирхол бүхий байх магадлалтай эрх бүхий албан тушаалтан, эсхүл ТУЗ-ийн дэргэдэх аудитын хороонд нэн даруй мэдэгдэх;

4.3.2. Шаардлагатай тохиолдолд сонирхлын зөрчилтэй хэлцэл хийх, цаашид үүсэж болох эрх зүйн дагаврын талаар компанийн ТУЗ-ийн хуралд материал бэлтгэж танилцуулах;

4.3.3. ТУЗ эсхүл ХЭХ-аас сонирхлын зөрчилтэй хэлцэл байгуулах зөвшөөрөл гарсан тохиолдолд холбогдох хэлцлийг хууль тогтоомж, энэхүү журам болон хэлцэл байгуулах ерөнхий нөхцөлийг тодорхойлсон ТУЗ-ийн тогтоолд нийцүүлэн хянах;

4.3.4. Гүйцэтгэх захирал нь сонирхлын зөрчилтэй байж болохуйц хэлцлийн талаар Компанийн ТУЗ-д мэдэгдэх, эсхүл ТУЗ-өөс олгосон эрх хэмжээний хүрээнд гэрээ байгуулах.

4.4. Хувьцаа эзэмшигчдийн хурал хуралдах өдөр компанийн өдөр тутмын аж ахуйн үйл ажиллагааны явцад хийсэн хэлцлийг сонирхлын зөрчилтэй эсэхийг тодорхойлох боломжгүй бол хувьцаа эзэмшигчдийн хурал нь хийх хэлцлийн төрөл, хэлцэл хийх этгээд болон хэлцлийн үнийн дээд хэмжээг тусгаж бусад этгээдтэй хамтран компанийн хэрэгжүүлэх аж ахуйн үйл ажиллагааг батлах шийдвэр гаргах бөгөөд энэ нөхцөлд энэ журмын 3.6-д заасан шаардлагыг хангасанд тооцно.

ТАВ. ИХ ХЭМЖЭЭНИЙ ХЭЛЦЭЛ

5.1. Их хэмжээний хэлцэлд дараах хэлцлийг тооцно. Үүнд:

5.1.1. Хэлцэл хийхийн өмнөх сүүлийн балансын активын нийт дүнгийн 25 хувиас дээш зах зээлийн үнэтэй эд хөрөнгө, эд хөрөнгийн эрхийг худалдах, худалдан авах, захиран зарцуулах болон барьцаалахтай холбогдсон хэлцэл, эсхүл хоорондоо шууд холбоотой хэд хэдэн хэлцэл; /Компанийн өдөр тутмын үндсэн үйл ажиллагаатай холбогдсон хэлцэл үүнд хамаарахгүй./

5.1.2. Компанийн урьд гаргасан энгийн хувьцааны 25 хувиас дээш хэмжээний энгийн хувьцаа, энгийн хувьцаа авах эрхийн бичиг буюу энгийн хувьцаанд хөрвөх үнэт цаас гаргах, эсхүл хоорондоо шууд холбоотой хэд хэдэн гаргалт.

5.2. Компанийн их хэмжээний хэлцэл хийх зөвшөөрлийг Компанийн тухай хууль, компанийн дүрэмд заасны дагуу ТУЗ олгох бөгөөд ТУЗ-ийн гишүүд санал нэгтгэйгээр буюу 9 гишүүний дэмжсэн саналаар шийдвэрлэнэ.

5.3. Энэхүү журмын 5.2-т заасны дагуу ТУЗ их хэмжээний хэлцлийг санал нэгтгэйгээр шийдвэрлэж чадаагүй тохиолдолд хувьцаа эзэмшигчдийн хурлаар шийдвэрлүүлнэ.

5.4. Энэхүү журмын 5.3-т заасны дагуу их хэмжээний хэлцлийг хувьцаа эзэмшигчдийн хурлаас шийдвэрлэхдээ хуралд оролцож байгаа хувьцаа эзэмшигчдийн олонхын саналаар шийдвэрлэнэ.

5.5. Их хэмжээний хэлцэл батлах тухай хувьцаа эзэмшигчдийн хурлаас гаргасан шийдвэрийн эсрэг саналтай байсан, эсхүл санал хураалтад оролцоогүй хувьцаа эзэмшигч өөрийн эзэмшлийн хувьцааг эргүүлэн худалдаж авахыг шаардах эрхтэй байна.

5.6. Их хэмжээний хэлцлийн эд хөрөнгийн болон эд хөрөнгийн эрхийн зах зээлийн үнийг ТУЗ нь Компанийн тухай хуулийн 55 дугаар зүйлд заасны дагуу тогтооно.

5.7. Шаардлагатай тохиолдолд их хэмжээний хэлцэлд тооцох эсэхийг аудиторын зөвлөмжийн дагуу эд хөрөнгийн балансын үнийг мөнгөний ханшны уналтын түвшинтэй зохицуулан шинэчилж, дахин тогтоож болно.

5.8. Компани нь компанийн тухайн жилд хийгдсэн их хэмжээний хэлцэл, түүний үнэ зэргийг улирал, жилээр нь нийтэд мэдээлэх үүргийг хүлээнэ.

ЗУРГАА. ХЯНАЛТ

6.1. ТУЗ-ийн дэргэдэх аудитын хороо нь жил бүр энэхүү журмын биелэлтийг хянаж, үнэлэх бөгөөд шаардлагатай гэж үзсэн тохиолдолд шинэчлэх, өөрчлөлт оруулах саналаа ТУЗ-д оруулж шийдвэрлүүлж болно.

6.2. Энэхүү журмын өдөр тутмын хэрэгжилтэд ТУЗ-ийн нарийн бичгийн дарга, Дотоод аудитын нэгж хяналт тавьж ажиллана.

ДОЛОО. ХАРИУЦЛАГА

7.1. Компанийн тухай хууль, энэхүү журамд тодорхойлсны дагуу нэгдмэл сонирхолтой этгээдийн талаарх мэдээллийг ТУЗ-ийн нарийн бичгийн даргад хүргүүлээгүй, нэгдмэл сонирхолтой болохоо мэдэгдээгүйгээс, хууль тогтоомжоос гадуур сонирхлын зөрчилтэй хэлцэл байгуулагдсан болох нь илэрсэн, үүнээс үүдэн Компанид болон хэлцэл хийсэн талуудад хохирол учирсан тохиолдолд тухайн албан тушаалтан өөрийн хөрөнгөөр бүрэн хариуцна. Түүнчлэн уг зөрчил гаргасан албан тушаалтныг сонгосон, томилсон эрх бүхий этгээд хугацаанаас нь өмнө чөлөөлөх шийдвэр гаргах эрхтэй.

7.2. Энэхүү журмын 6.1-т заасан этгээд нь нэгдмэл сонирхолтой этгээдтэй хийх хэлцлийг Компанийн тухай хууль, энэ журмын шаардлага, тогтоосон журмыг

зөрчиж хийсний улмаас компанид учруулсан хохирлын хэмжээгээр, эсхүл хэлцлийн үр дүнд авсан зүйлээс олсон ашгийн хэмжээгээр хариуцлага хүлээнэ.

7.3. Энэхүү журмын 4.2-т заасан үүргээ биелүүлээгүй ТУЗ-ийн нарийн бичгийн даргад Хөдөлмөрийн тухай хуульд заасан сахилгын шийтгэл ногдуулна.

7.4. Өөрийн буруугаас компанид хохирол учруулсан журмын 2.2-т заасан этгээдэд энэхүү журам болон бусад хуульд заасан хариуцлагыг оногдуулсан эсэхийг харгалзахгүйгээр Компанийн тухай хуулийн 85 дугаар зүйлд заасан хариуцлага хүлээлгэж болно.

7.5. Компанийн энгийн хувьцаа эзэмшигч эсхүл компани нь энэхүү Журмын 3.1-т заасан этгээд эсхүл уг этгээдийн дангаараа бүх хувьцааг эзэмшдэг хуулийн этгээдээр компанид учруулсан хохирлыг нөхөн төлүүлэхээр итгэмжлэлгүйгээр шүүхэд нэхэмжлэл гаргах эрхтэй.

7.6. Сонирхлын зөрчилтэй хэлцэл байгуулах журам зөрсөн этгээд нь Компанийн тухай хуулийн 93 дугаар зүйлд заасан хариуцлагыг хүлээнэ.

НАЙМ. БУСАД ЗҮЙЛ

8.1. Энэхүү журмаар зохицуулаагүй бусад асуудлыг Компанийн тухай хууль, Үнэт цаасны зах зээлийн тухай хууль болон холбогдох бусад хууль тогтоомж, Компанийн засаглалын кодекс, “Монголын цахилгаан холбоо” ХК-ийн дүрмээр зохицуулна.

8.2. Энэхүү журам нь ТУЗ-ийн хурлаар батлагдсан өдрөөс эхлэн хүчин төгөлдөр болно.

ooOoo